

KOCHUAM PITING

Kochuam piting i tēna matchak uh hi bang bang a hi diam ti vak ngaitua khawm leu hen nawp a um hi. I kikhawmpi chia dan a chun Preaching station hi Branch Church ah lankai a hia, zia nung a chun Bial leh Presbytery in piting tawk ah a hiat chun Kochuam piting in a langkai sek ui. Maleh, a tētu Bial leh Presbytery standard apat khan Kochuam piting ah lankai leh lankailo khale a kinga lian thei khawp mai hi.

Presbyterian Church of India in a tē nau chu: thawlawm lam ah mani kitodel thei, building leh property ah kiningting, administration lam ah buailo, semtute training kitup tak ah nei, missionary nasep le thei dan dan ah ngai khawk tite hi hileh a kilawm khawp mai hi. Muthei ah tēna ding ah chun a hawi tawk ma ma in ka hiai.

Mutheilo ah i kitēna ding un: Kochuam Upate leh Kochuam mipite lungthim putdan te hi a Kochuam zel na em? Hunpum ah nasemtu i nei teu hin Pathian nasep in a sem zel nau em? I Pathian biakna'u ahin Thagauthiangtho in mun a changzo zel na em? Kochuam in kivaihawmna i nei teu haw leh Office apat thusuak te haw hi Kochuam lamin i bawzui zel sek nau em? Pastor te leh Upate haw a pangkhawm hawi zel nau em? Kochuam ah um hi Kochuam mipi te a lungawi zel nau em? I Kochuam sung hi nauchaga leh migenthei te a dingin chawldamna a hi zel na em? Dawtna tamtak umthei nalai ina maleh zia chan hi kidawng phawt hi tiu.

Ka umna Kochuam apat bang ka lawkpi diam ti sangin ka umna Kochuam ahin bang gualin ka phachuam thei diam ti hi i ngaitua nau hi zaw thei taleh vang Kochuam piting kibi tamai in a ka ti ve!



Kochuam Huang

1. Office chiadan kizilsakna:

Pu Robert Haliday, Office Superintendent Synod Office mapuina in April 09, 2022 a khan Manipur Area Office staff zosian training nei a hia, office chiadan le thil kisang danglam khenkhat um ding a hia, office i dawr tak ualeh i hiatthiam uh ngai ding a hi.

2. Audit thu: Mizoram Presbyterian Kochuam: Manipur Area sum audit April 11, 2022 ni khan zawfel a hia, sum leh pai bit leh fel tak ah etkawl a hi. Audit hungbawl te chu:

i) Upa Lalmmasaa, Chawnpui Kochuam, Aizawl

ii) Upa Zosangzuala, Dawrpui Kochuam, Aizawl

3. Bial Kikhawmpi thu:

Panglian Pastor Bial te hi a Bialtu Pastor Rev. Thangneipau operation hatzo nailo a hi ziakin May 27-29, 2022 in Bial Kikhawmpi a mang ua, kum 2022 Bial Kikhawmpi chu phatak ah matzaw chiat ta hi a hiat a hia, kipak aum hi.

4. Finance Campaign thu:

Pathian lungsiatna zalin Finance Campaign a thumveina chu May 07, 2022 in zaw fel a hi tai. Zia hi Kum 2021-2022 Finance Campaign ding ah ala kiguanggal zawfelna ahia, guat ah umte hawn amau group chiat ah phatak ah supiting hi ah hiat a hi ziakin kipak aum ma mai.

5. PCI hotute tawh kimukhawmna:

Rev. Rolianthanga Ngirsim, PCI Sr. Administrative Secretary pawtdawk leh Rev. Khamchinkhai PCI Elect Moderator te chun KJP Kochuam Upa khenkhat tawh kitawn in Office a hung ve ua, Staff te tawh holim khawmna hun nuam tak mat a hi.

6. Sunday School Training

thu: May 19-18, 2022 sung akhan Thangkai Lungpau Hall ah Sunday School Training lawting tak ah nei zaw a hi tai. Resource person Pu HK Hmingthanzuala, Bawngkawn in Secretary nâ leh a mawpuakna, Sunday School chanchin, Sunday School pawimawna, Zilsaktu hîna leh mawpuakna chuleh Sunday School pha siam dan ti te a zilsak ah; Upa K. Vanlalnghaka,

HINNA VÂK

Ramhlun East in Sunday School kietkawl dan leh kikaihuai dan, Psychology leh Zilsak dân te a zilsak hi. Zia hun ah Bial tin a pat i pan thei dan uh chu ziagual hi a hi:

Lamka Pastor Bial	-3
Jiribam Pastor Bial	-1
Mata Pastor Bial	-3
Kangvai Pastor Bial	-3
Panglian Pastor Bial	-3
S. Kawtlian Pastor Bial	-3
S. Munnuam Pastor Bial	-3
D. Khawzim Pastor Bial	-3
Munpi Pastor Bial	-3
Phailianbung Pastor Bial	-3
Kawlhen Pastor Bial	-3
Leilon Pastor Bial	-2
Phaipheng Pastor Bial	-3
K. Sharonpai Pastor Bial	-3
Dumlian Pastor Bial	-3
New Lamka Pastor Bial	-3
Imphal Pastor Bial	-3
D. Phailian Pastor Bial	-3
B. Phainuam Pastor Bial	-3
Sugnu Pastor Bial	-3
Leijangphai Pastor Bial	-3
Total	-60

7. Khristian Khanglai Pawl:
Manipur Election ziak ah Khristian Khanglai Pawl General Conference kimang thei talo kha tu tha May 13-15, 2022 sung a hin Lamka Pastor Bial in Head Quarter

Veng public ground ah pandal nuam tak siamin a zintun ah, Lamka Kochuam Biakin ah Kivaihawmna fel tak tawh zaw a hi tai. Kum 2022-2024 sung ah Office Bearer ding ziagual ahin guat a hiu:

Leader :

Rev. Lalpiaklian

Asst. Leader :

Pu Mangzalun

Secretary :

Upa Genminlun

Asst. Secretary:

Tv. Thangmohan

Treasurer :

Nk. Nemlalthuam

Finance Secretary :

Tv. Sutminthang

CKKP Committee members:

Pu T. Zuan, Pu Lamjoylian,

Tv. GK Lalneu Suantak,

Tv. Nenglalsang,

Tv. Thangneikhup,

Tv. Lunmalsawm,

Tv. Kennedy Paumuankhup,

Tv. GreenonSatminlensang

Tv. Vangpu, Tv. Gintlalsiam

Tv. K. William, Nk. Tingsiamkim

Nk. Florence C. Moite

Nk. Hoizokim

Ex-Officio :

Rev. PB Zosapthara A/S

Rev. S. Lama Vaiphei, Coord.

THAGAU AH MI – KHRISTA THUHETU

*Rev. P.B. Zosaphara
Administrative Secretary*

(*Sim ding : Joh 15:26-27; Nas 1: 6-8*)

1. Pathian Thagau puihuai ah umte hi thagau mi a hiu.
2. Thagau mi chun hangsan takin Khrista thu a hiatpi ui
3. Khrista thuhiatpitude chu thi tiangin a ding det u’i.

Thumapui :

I thupi uh ‘Thagau mi – Khrista Thuhetu’ ti paukam hi Mizo Khristiante lak ah chun i ha mat ma ma mai a, chuti ahi zinglai in Thagau mi tak tak hi i mekbel leh i kawksak dan hi Bible gen tawh a kibang zo tak tak lo mai dia aw ti hi lungthim in a um sek hi. Paul hin Thuthungthak lam ah Thagau mite um dan leh khawvel mite um dan chung chang a gen nasa ma ma hi. Paul hun lai Kochuam ah hin LIMNA; Thagau mîtna tia i gen uh hi a tung nasa a hi. Zia chu tam takin a hethiam puau a, zia limna chun ‘Thagau mi’, kawisân hiau na a um sek hi. Ama Paul chun zia zosia hi Khrista batna lam a puihuaitu a hi ti in a gen hi.

Zia limna hin Korinth khua ah Khristiante le ala buai sak ma ma hi. A limte lak ah kikhen chuamna a um inle nasa takin a khâm sek hi.

Khawvel mite chun khawvel thil, mani kipakna a hawl sek u’i. A dawidan uh a lungthim put uh tawh kituak bep a kipakpi sek ui. Paul hin Thagau mite chun Khrista batna lam

ah nisin puihuai in a um sek dan thu te a gen a hi 1Kor 2:14ff ah khan Thagau mi chun thil bangkim a hechian sek a, Khrista ngaitua gual ah bangkim ngaitua a gaw sek hi.

- 1. Pathian Thagau puihuai a umte hi thagau mi a hiu:**
Bible in Thagau mi ah a gen i mu te chu-

HINNA VÂK

1. I kor 2:9,10 'Mit ah mu ngai lo bil ah hiat ngai lo mihing lungthim a lut ngai lo' thilte chu hiatsak in a um sek hi. Ama lam a tlafei thung \hin

2. Pathian pilna thuguk gilte a hiatchian theina ding ah Pathian kiangah mi ngei pilna nei sek 1kor 2:13

3. 1 kor 2:14 ah chun Khawvel mite chun Thagau lam thilte chu a kipakpi puau a, amau a dingin thil ngawluhai a hi ziak in, Thagau mite'n vang bangkim a hethiam sek u'i a ti a hi.

Pathian puihuai ah um zosia te hi Thagau mite chu a hi ti in gen lehin dik pen in a.

Bangkim a hin a suadaw a um sek a. Vak a umna lîm a hung um ziang gual deu hi a hi mai hi. Thagau mi iti hile, 'KITHAGAUMI SAK' a um kit hi. Ziagual ah kithagaumisak te hin kituakpi a nei tam lo khawp mai u'i, a kibatpi te'u bep tawh a kithua thei ua, limna hawl in a vak vel vel sek ui. A phunchiak tam ma ma ua, lungawilona ding a hau ma ma sek u'i. Gensiat a hua'u a, mi gensiat a thanuam ma ma kit u'i. Khenkhat chun ziagual mite hi khuang thagau chang

ti in a gen sek u'i. Kivawppi thiam a hak ua, mani nawpna leh limna ding lam bep in a taima sek ui.

Thagau mi, Pathian puihuai a umte vang bangkim in a pilvang ua, mi um leh umlo inle a hinkhua'u lamzawt a chuan pel diak lo uh a hi. O.T ah Joseph kha.. a pi pindan ah khan kuama a um puai.. Pathian mi a hina a lang mai a hi. Danial te'n thina pumpel a gaw diak puau. Pathian pui gual zel in a um tawp mai u a hi kha. Thagau Thiangtho tun ngak tute kha, a ngak uh a tun khan a hangsan ma ma tau kha. Amau ngai bep a thudik hi lo, Pathian thudik kha a hânsan pi ngal u'i. Pathian dawidan bang a h'em ti kawm ah awlcha cha chia te hi Pathian Thagau pui, Thagau mi chu a hui.

2. Thagau mi chun hangsan takin Khrista thu a hiatpi sek u'i :

I genlat tak uh Ziltilte chun a mu leh hiat te'u kha genlo in a umthei puau a. A masang ah a lau ma ma uh, khawvel vaihawmtute kha a maitua ngam ta uh a hi. Gingtu tam takte hin chu i muthei khawvel vaihawmtute ma ah

hin i lang melpha zaw sek ua, a guk ah ei mu zingtu Pathian ma ah i thiangtho kitlo uh a hi. Zia chun hangsan tak ah Pathian thu hi ei gen sak theilo sek a hi. Pathian chu hepina a hi ti gen ding i hi chun; i hinna ah Pathian hepina a lat a ngai hi. Chang ah um leh mipi lak ah um hin i hinna Pathian thu danglamna a um ngailo sek a hi. Mihingpite mu phak lo ah um hi i thiam lo ma ma sek u'i. ZU, Nungak-tangvalna, Nekgukna, Midawha bawlna, zia zosia hin Thagau lam hinna tawh kigamla ma ma dingah ngai a hi lai in, i hinkhua'u ah a bek zing zawk mai sek hi bang law ding a hi diam? Mi mûna bep a thagau mît hi a huntawk ta lo a hi.

3. Khrista thuhetute chu thi tiang in a ding det u'i:

Sawlchakte kha zia khawvel ah hin Pathian thagau pui a hi dan uh a latsak chian khawp khawp mai u'i. A khenkhat thing âtna âttan te, gen ding a tam hi a thina'u khan LALPA a chawihawi vek mai a hi. A thisan kha tuni tiang ah Kochuam zosia i um theina a hi tai. Thi tiang ah ginum in um in tichun hinna Lallukhuk hun pia

ding ka hi ti hi a vawp zing ta zaw uh a hi. Hebrai ah chun zia lei ah hin mikhual leh khualzin mai a hui ti a hiatsak zo ta bawka ua. A pawtdawnau gam chu lunggul kit leu, kilekitna ding lemchang nei ma ma in au.. Ava mawi em, thitiangin a ginum ua a dingdet sek uh a hi. Lasak a tui leh tuilo in a phun tapuau a, kikhawm tawm leh tawm lo in a phun tapuau a, khawtang vaihawmna lam ah chun a phunchiak uh ginchak a umlo khawpmai hi maw...

I gen tak gualin Thagau mi ti hi genchian hak tak khat chu a hi, tawidan ah leh hindan ah kilang hi zaw leh a kilawm ma hi. Amabochu, thagau mi hinna chian takah hung kilang chu – a nun a lim a, a hangsan a, sual do nun a um a, zia khel lam ah chun phatna in a pak dawka hi. Thagau ah dimin um un ti hi dawi tel ding tina lam a hi puai, thupiak a hi zaw a hi.

Thagau a mi/dim ding chun Pathian in bang gual ah um ding in ei dawi em ti lungput nei pum a kipiak a, zia lam a dangchak chu a ngai a hi. Mat.5:6 ah chun **felna a gilkiak leh dangchakte chu a vang uh a phai, tai leh niansak ah um**

HINNA VÂK

ding a hi ngal ua, ti i mu'i. Ei uh chu i dangchakna hi Pathian thagau lam sang in khawvel thil, tisa nawpna chi chuam chuamte, sum leh pai te khawvel thil ah san nawpnate a hi sek hi. Khrista felna hinpi lam ah hin dangchak hitiu, Thagau lam ah tai mai ding i hiu.

Thagau ah dim ding chun kikut awng(kikhua thian) a ngai sek hi. **Tuibel ah tui i sun ding chun bel chu a awn masak ding a hi**. Bel sung ah chun thildang anchang a h'em tui hilo a um chun tui in lua dim thei pua'n tin, ziaziak chun a hawm a hi a ngai hi.

Unaute haw Gal 5:22 ah chun Thagau ga i mu'u a. **"Thagau ga chu hepina te, kipakna te, chamna te, dawtheina te, nunnemna te, phatna te, ginumna te, thunuaigawlina te, kisumtheina te a hi"** Thagau mite hinna chun kihepituana a um a, kidawisakna te, lungthim sunggil ah le kipak tak tak na te a hung um zel a, midangte tawh kisuk lungawilo chang in le dawtheina a hung um sek a. Bang nâ sem lehle, phatna leh ginumna te, thil phalo lak ah kisum theina te mi'n a nei sek u'i. Kawng bangkim ah Khrista thuhetu a hina'u a latsak sek u'i.

"Joseph kha, a pi pindan ah khan kuama a um puai, Pathian mi a hina a kilang mai a hi. Danial te'n thina pumpel a gaw diak puau, Pathian pui gual zel in a um tawp mai uh a hi kha. Thagau Thiangtho tun ngak tute kha, a ngak uh a tun khan a hangsan ma ma tau kha. Amau ngai bep a thudik hi lo, Pathian thudik kha a hânsan pi ngal u'i. Pathian dawidan bang a h'em ti kawm ah awlcha cha chia te hi Pathian Thagau pui, Thagau mi chu a hiu."

PENTECOST NI ALA UMLO HILEH

~ Rev. K Jama Vaiphei

“Himaleh, Thagau thiangtho chu a hung tun phat leh, thil hi thei na nei tan lau...” Nasepte 1:8

Pentecost ni chu Lal Jesu’n a phuak kawm hilo in Pathian in ala namtel Israel te hun mat dan tawh kituak ah Pathian nasep hung um zel a hi ti leu hin hiatthiam bailam pen dingin ka gingcha’i. Judate’n Festival chuam chuam a nei teu lakah Chiakan Kût a mat laitak un Lal Jesu mat leh khetden in a um a, a thawkit nung in ni 40 sung khawvel in a cham nalai a, a nungzui te leh midang dang te kiang in a kilak vel vel a, a kikhetden mâ a thuhilsa te ban ah pawimaw a sak te a nungzuite a hil nalai hi. Sapte’n “ Final touch”atiu, ei pau in a ‘thualna’ a h’em a hilnawn na le tithei in a. Zia zaw a chun van ah a kalto ta, van a kalzaw apat ni 10 tinni, a thawkit a pat ni sawnga na(50 na) Juda te’n Pentecost Kût a mat laitak uh – gamla tak tak apat Juda sakhawmi tak tak a hung kisitkhawm laitak uh (Pentecost Khawmpi ti mai hitiu) chun Thagau thiangtho chu van a pat in ahung kum suk ta a hi.

La phuak tu’n “Pathian thil geldan hi amak na e” ati gual in Rom sawlkar hat laitak, kikawmtuana lampi hawi laitak, Greek pau tuallen laitak in Thagau Thiangtho nasep leh Thagau nasepna pat hung piang dawk ding “Chanchin pha puan zak” na nâ chu a kipan a hi.

Thagau Thiangtho hung tun ma’n Lal Jesu’n a thupiak gual in lauthawng ma ma leu le nungzui te leh amau dinpi ngam te khan Jerusalem a nusia puau. Lal Jesu huaise tak leh mualpho takah tha ah a umna mun a khan ginum tak in Thagau Thiangtho a hung tun didan leh a umzia a hetsau

le hilo chu thuawi tak in a ngak tawp mai uh a hi.

Thagau Thiangtho a hung tun phat a chun :

- Thakhat in van a kipat hui hattak gi tawbang a hung tung phut ah, zia chun a umna in uh a hun lua (chôm) dim tai. Sawlchakte 2:2

- “Meikuang gualah kilang lei a hung um a (meikuang diang gual himai thei) alak un a ki hawm zak ah, a chang chiat tau” ti a hi. (Sawlchakte 2:3)

- “A leng un Thagau Thiangtho in a hung dim tau a, Thagau in a pausak dungzui in pau dang/pau chuam in a hung pau tau a.” (Sawlchakte 2:4)

Nungzui te’n kuama a thugen uh ngaitha ding ah a ko uh ngailo in, zia husa leh thawm leh thilmak tung ziakah chun mipi tam tak a umna lam ua chun a hung pungkawm ua, ziate ma-ang a chun, Peter in hangsan tak leh thil hithei tak in thu a gen pum pum ngam ta a hi. Peter chun Juda mipi te chu, ‘kasuapite haw’ ti in Jesu a hiat thiamlo ziak ua a

thâpa’u kha, Pathian miguat Messiah a hi dan leh a thawkit dan hangsan tak in a gen a, mipite chun le, a hun taksang ua, zia ni hung taikhawm laka mi sangthum vel chun Jesu chu a gingchau a, gingtu 120 vel chu nikhat in 3000 val a pha tau a hi.

Bang ziakah ziagual thil chu um thei a diam iti chun :

- Nungzui te’n thumang tak leh ginum takah pauchap kawm a Thagau Thiangtho hung tung di a hun sawl/piak di pan a thina khua Jerusalem leh “pindan chungnung kithakna An Thiangtho” a nek khawm nunung pen na mun ua kha ala ngak chal chal pei ziak uh a hi.

- Nungzuite Pathian mattâk ding ah kipumkhat tak leh kithutuak tak a, kuama vak thaithap leh chang tat umlo ah a um theina ziak uh a hi.

- Thagau thilpiak a Chandan dungzui ua, gendaw dingah hiatsak leh piak ah um te hangsan takah a gen ngam ziak uh a hi.

- Thagau in a luadim thei dingah hinkhaw Thiangtho

June 2022

leh thu awina (Holy and obedient) a neina' u kha Pathian in a mang a hi.

Thukhakna:

Pentecost nî Thagau Thiangtho kha tuni ei uh Jesu gingtute a hin le a um chiat ah, nâ le a sem zing hi. Himaleh, i khawvelmitna' u leh gitlona ah le i ngaikham lo uh, nawsua/ Thunun hina kham em chu hilo - muk leh kam kisum zawlo nate, Bible sim leh pauchap peilo nate, Thukhelna te, huaihapnate, thangthip nate, kithunun zaw lo nate leh a dang dang te ziak in i Thagau

lam hinkhua teu hi chau leh ngui in i um khasek uh a hi.

Pentecost ni ala umlo hile chunungzuite kha le Thagau a dim leh hangsan tak a thu ala genlo di ahiu a, kochuam le ala dinglo maithei a hi. Kochuam in mâ a sawn zel ah, Thagau Thiangtho zal ah ei haw mangcha Khrista Lalgam keklet a hi zel theina ding in ei haw le nungzui te gual ah Thagau a dim ah hangsan tak a chanchinpha i gen zel uh a ngai a hi. Ei mau ah Thagau Thiangtho um a hat theina di' n Lalpa' n a thu ei mawlsawm piak ta hen!

THAGAU THIANGTHO HUNG KIPATDAN LEH A NASEP

(Lev. 23:15-17, Acts 2:1-4, Gal. 5:16)

*Rev. Thianginlim
i/c S. Munnuam Pastor Bial*

Thumapui: Lalpa lungdam kum, kum 2022 sung ah le pentecost ni, June tha Pathianni masa pen i hung tung kit tau a. Zia ni pawimaw tak mai hun ahin A/S office lam a hotu te dawisakna chang in zia monthly magazine dawi um tak mai 'Hinna vak' ahin Pentecost day message zik dingah dawisakna ka chan zia kin ka kipak a hi.

HINNA VÂK

Pentecost day hilchianna:

Pentecost kiti hi Arabic pau a hia, zia chu sawmnga(50) tina a hi. Bangziak ah 50 kiti ziang a h'em? B.C lai a Israel te thawi panglo changbuang kut, a zing nikhua apat kisim ah a ni sawmnga (50) tinni ga masa kût nikhua a hi. Chutia chun (50) Pentecost kut ti in a la kigen a hi. (Leveticus 23:15-17)

Chutichun A.D phat in sawlchak te thutep ngak ah a um zing lai un Pentecost ni chu a hung tung ta'n, gamasa ni a hi dungzui in thagau thiang le sawlchak te chung ah a kibutthak masak ni chu a hi. (Acts 2:1)

Sawlchakte gamasa a chan gual un, amau haw thugen kisân te haw sia eiuh le thagau gamasa chu chang i hi tau hi. (Rom 8:23)

Gamasa ni, Pentecost ni umzia nei tak leh ni pawimaw khat a hi ziak in, Pathian in bang hi ziang lehle gancha hihen mihing himaleh a gamasa, a piang masa chu kei a a hi ati a hi. (Exodus 13:1)

Ziagual ma chun thagau lam

a din Khrista(Messiah) chu a thite zosia lak ah, a thokit masa pen a hi ziak in Pathian a ding in ama chu gamasa in a pang tai. (1Corinth 15:20)

Ziagual ma chun a thisan ah khawvel mihiam te lakah a chawk daw te ahi tau hi. (Rev. 14:4)

Chuti chu ahi ziak in suapi nang leh kei gamasa te lak ah chu i pang dinguh a hi na em? Kigel hitu, gamasa i hitheina ding dawina'n ei la(hin) chawk a hi Pathian in. (Jacob 1:18)

Tu'n nang leh kei a dingah pawimaw pen chu taksan ah a thupiak zawp hi a hi tai. (Thupuan 14:12)

Lev. 23:15-16. March 31 apat May 19 sung- Pentecost days. (50 days)

Lev. 23:17. Epha mun 10 akhen mun 2 thu 10 piak a hi. Epha mun 10.

Thuthunglui leh thuthung thak ah khen- Epha mun 10 akhen mun 2 pen ahi.

Changbuang zethiam di pani

- Khrista. Pathian Chapa leh
- Thagau thiangtho.

Changbuang a nêl- Khrista chanchin ti na a hi. Thawi thawh awm, Lalpa dingah bawl masak pen piak di chu-Taksa leh lungthim genna a hi. Tu masang ah ala kiha mat beklo maleh, Pentecost nikhua hi Christian te a ding ah nikhua thupi tak mat lo thei ahi puai. Zia ziaakah chun Pentecost hi bang ti hung kipat a h'em? O.T hun lai a bang tin amat u a h'em? Chuleh ei uh a din bang a phachuam em? Gen khawm hitiu.

1. Pentecost- Greek pauva- "udoh" ti a hi.

Pentecost a nikhua leh a hun hiatna.

Khristmas kimat gual a mat hilo. Jesu thân a kipat a thawkit ni sim ah ni sawmnga(50) ni mat a hi. Thagau thiangtho kisawlni ahi ziaak ah mat ahi pua, a um sa a hi.

2. Pentecost hiatna minte:

a) Hapta kut tin leh ala mang sek u'i. Exo. 34:22

b) Thaithak masapen 'kût' le a kiti'i.

c) Israel ten le dan bu "TORAH" amu daw nau "SHAVOUT" tia ala minvaw

ua ala mat nikhua uh a hi.

3. Israel te kût.

Pentecost hi Israel te "Kût" min khat ala hi.

Israel ten kût 7 anei ua. Zia te haw lakah chun thupi deu deu pathum a um in

a) Chia kan kût.

b) Bawkcha kût.

c) Pentecost kût a hi.

Pentecost ni hin, mi ala kikhawm tam pen sek uh a hi a kiti'i. Zia nikhua hin Lalpa'n thagau thiangtho ahun butthak nikhua a hi ziaak ah chun mi 3000 jen in hukdamna a kimu uh a hi. Pentecost ni ahi ziaak ah thupi a hipua, Pathian in thagau Thiangtho ei hun sawl piak ni ahi ziaakah thupi a hi zaw'i.

4. Khrista masang leh a nung ah Pentecost têkhin.

a) Khrista masang ah Dan thupiak chu tunung ah Thagau thiangtho hung kipia ding etsakna a hi.

b) Thawi sawlo vaithum pa ni (2) (Lev. 23:15-17) chu, tunung ah Juda te leh Gentile te etsakna a hi.

c) Vaithum kisuthiang tuak

daw chu Messiah kisugim ding etsak na a hi (Isai 28:28, 54:17).

d) Bugâ lakkhawm chun gitlo haw lakkhawm ding etsak na a hi.

e) Mosi'n thusawm (10) piak a va lakah sum pin Horeb tang a tuam chun, ziagual a chu Pentecost nikhua chun thigua hattak ala hang ah ti a kimu a hi (Acts 2:2).

5. Thagau thiangtho thil bawl theina apat thil pawt te:

Thagau thiangtho ei hun sawl piak lo leh, taksa leh thagau a kicha 'or' lau takah um ding i hui. Thagau thiangtho in sawlchak te khut mangin mi 3000 zen in thagau thiangtho a chang ui. Christian te a ding ah, Juda sakhua apat Christian sakhuatna hukdamna lopi tak a mu nikhua a hi tai. Ziaziak chun, Jesu apat hukhinna diktak nei chu, Lalpa thagau chang a hi tai. Zia gual mi chu ga'n a zui ding a hi. Lalpa thagau dik tak chang chu la hi leh, nang a kipat thagau ga chu ga ding ahi. (Gal.5:22-24)

6. Thagau hukhing na chu kichai ziang ding a h'em?

Kichai zianglo ding a hi. Acts 1:8 a chun Jesu'n a genna, ka thu hettua sak a la pang ding uh ahi atia, zia chun a etsak chu thagau hukdam na diktak neite chun thagau mang te lakah Jesu thu hettua sak a pang ding a hi. Thagau a hing mi te chun, thagau a thite a lainat ding a hi. Zia chu Lalpa kipakna a hi. Ahinla, tulai kochuamte, mi khenkhat in, Khrista ei ngansia na gualah semlo- a) loitum siam leh b) Mi hek sia etc.

Ahi leh, ei uh kochuam te lakah Lalpa hukhinna leh thagau thiangtho nei te vang hin chu a thu hettua sakah pang ding i hui (Acts 1:8, Matt 28:19).

Conclusion.

Ziaziak chun, suapite kikhual chian chiat hi tiu. Khrista thagau a hukhin na chu inei u a hi nam? Thagau thiangtho chu i chang chiat uh a hi nam? Chuleh, a thupiak gualah i sep uh a hi nam? Khrista thagau hukhinna chang pum ah Lalpa thupiak zui dingin Lalpa min in ka hun chial la hui; Lalpa'n a thu malsawm ta hen!

HUKDAWNA

(Genesis 45:5 ; Esther 4:14)

~Rev. Genpau
Hilltown

Thupi ding ah hung kiteldawk “Hukdawna” hi a pawimaw ma ma ziang ah, a ziak chu mi zosia hukdaw ngai sa hung piang dawk i hi ziak uh a hi. Zia hukdawna nasep sem ding ah chun Pathian in mi zosia a daw i ah himaleh a mangcha vek thei diak puai, zia ding a chun titna/hina a pawimaw zia kin. Zia te chu a nuai ah tea pat hin vak thil khawm hitiu.

Joseph: Joseph a pa'n a u te Sekhem ah gan ching ah um te a dam nau em, gancha te le a pha nau em ti entha dingin a sawl lai in ama le thumang tak in a chia a, himaleh a tun phat in a u te a la um tapuau. A hawl ah lolai ah a vak vel chu mi khat in a mu, bang hawl a hem ti a dawng ah, aman ka ute hawl ka hi tia a dawnhu leh Dothan lam ah kichawm ding a gen ui a ti phat in Joseph le zia lam chu zuan in a chia tai. Pathian in a matchak ding ah a sek tak nawp ziak hintin a ute'n a galmu phat phat un tha dingin a thupuk tau a, kuak sung in a khelut tau hi. Himaleh suapi tha lawm lawm ziang chu a tiu

a, Ishmael te kiang in dangka shekhel sawmni in a zuak tau hi. Ziagual a tuak ziang kha chu hiatthiam haksa san tin a lung ngai ma ma ziang in a. Pharaoh nuai ah miveng pawl hotu Potiphar in Ishmaelte khut ah kipat a kichawm a, a insung enkawltu ding un a mang tai. Joseph kiang in Pathian a um a, a nasepna lam zosia ah malzawl na a dawng ah. Potiphar in a nei a heseng tapua, a nei zosia chu Joseph khut in a kawi tai. Zia lai a hin Potiphar zi in a dawicha ta, nisin luppi di leh umpi dingin a zawl zawl ziang sek hi. A zawl zawlo phatin a pawsal kiang in a hekse ta, ziaphat

HINNA VÂK

chun suangkul in a khum tai. Suangkul a pat Pharaoh mang let dingin puidaw in a um ah, zia kipat chun kuaman a ledaw theilo a ledaw ziakin Pharaoh le kipak in Aigupta gam pumpi hotu'n a siamtai.

Zia laitak hi Joseph in haksatna zosia a pal zaw nung ah hukdawna na a septhei na chu a hi.

“Himaleh zia tak a chia dingah lei zuak mang ziak ua khan lungkham kiu inla, kiawimaw diak ki un; hinna hukhing dingah Pathian in la malam ua ei la sawl masat a hi.” (Gen. 45:5)

Zia tawbang hun ahi la thip hiat hiat a hi chun, Juda mite a dingah panpina leh hukdamna khawilam a h'em kipat in hung ngei intin, himaleh nang leh la pa inkuante vang mangthai tho tho ding la hiu. Lengnu la hun pan hi ziagual huna ding ziak himaw lo ding ei vei; zia chu kuan he ding a h'em? Va ti dingin mi a sawl kit tai. (Esther 4:14)

Esther : Leng Ahasueras in Indai gam ah kipat Ethiopia

tiang gambung za sawmni leh sage sung in vai a hawm ah, zia hun hin Esther hi lehngnu'n a pang hi. Zia lai a hin lengpa gam pumpi ah Judate hi tha chimit sik sek dingah lengpa khutsebi suai nam in inpi apat gambung tin ah lekha thawt daw a hi tai.

Lengnu Esther hi a chipi te hukdawna dingah lengpa kiangah gen a ngai ta. Lengpa'n a ko lo leh va mawk chia ziang thei a hipua, a lung a awilo leh tha theina a nei hi. Ni thum anngawl ah pauchapna a nei zaw in Esther hin a chipi te a ding ah a hinna le itlo in Lengpa kiangah a va chia leh sana tiang chu ala lekkhum ta, Esther in le sana tiang mk chu a tu ngal tai. Lengpa tawh a kiho thei tak ziakun a chipi te damna ding chu a gen thei ta a hi. Esther in a hinna itcha lo hial ah a umna hin a chipi te thina kipat hukdawna a siam piak thei hi ti mu thei a hi.

Zia a chung ah hukdawna na semtute nasepna apat hin zia nasep sep didan chu mudawk thei ngei hitiu. Lalpa'n a thu malzawl ta hen!

NAZARETH TANGVÂL, KEIMA LEH NANGUH

*Pro Pastor C. Kailianson
i/c Imphal Pastor Bial*

Bible chang pansan te: Matthai 19: 16- 30, Marka 10: 17-31, Luka 18: 18-30

Thumapui:

Kochuamte Luchang, Nazareth tangvâl Lalpa Jesu min in Hinna vâk simtute zosia chibai ka hun buk hi. Tu chung ah Pathian thu i zil khawm ding'ua pha, pawimaw leh hawi ka sak chu Lal Jesu leh Mihausapa, Matthai, Marka leh Luka te'n ala zik uh, hausatna tamtak a nei ziak a Jesu zui ngam lo pa chanchin kha a hi. Thugen thiam minthang tak tak, bible thiam tam tak leh lekthiam tam tak te chun hun tam tak leh mun tam tak in Mihausapa chanchin hi etsakna zat chuam chuam in a la mang ta'u a hi. Etsakna tam tak leh tam zaw te hi mihausapa gensiatna leh awimawna a hi. I Lalpa Jesu, hausatna ziaka zui ngamlo chun ngaisan a law lo ding zia a kichian mai hi.

Chun, Thuthung thak ah i'n, Jesu tawh a kimu khel uhi a chanchin mun dang ah mu ding a um puai. Tichun, i thîl dit-det chun zillai leh thu pawimaw hawitak ei zilsak tho vângin, a chanchin chia zêl leh a hîna hiatdawk theina ding ah pansat ding chanchinpha pathum te lo ngal hi thil a um tawm ma ma hi. Ziaziak chun, mihausapa lunggel leh ngaidan i hiat theina dingin ama dinmun i kichan a ngai a. Tichun, tulai hun leh khawvel tawh kituak a Thu leh Lâ pawimaw tak i laidaw theina dingin, tuchung ahin chu, a chanchin thîl dan zatchuam deu ah thîl khawm i tup uh a hi. Mihausapa mit apat en in tulai khawvel leh kochuam te thîl khawm ding i hui a, zillai pawimaw tak mai ei zilsak ngei i kinêm a hi.

Keima (Mihausapa).... ka chanchin Nazareth Tangvâl
Chanchinpha ziktu te- tawh ka kimu na'u a la zik
Matthai, Marka leh Luka te'n sau sau ua, ahinla ka min, ka

HINNA VÂK

sāng leh suai te a ziklo ziakun, kenle hung gen da mai ing ka tin. Matthai in, Tangvâl hausa in eila gen a, Marka chun Mihausa kumtuang hinna hawl in ei gen a, chuleh Luka'n Vaihawm mi, mihausa in ei gen kit hi.

Ka hun lai uh kum 2000 vel ala chiata a khan, ka gam uh Rome sepai-te awpkhum Palestine gam a mihausa ah ala gen sek te' u chu sia-dawlte, vaihawmte, pharisaite, a dang dang leh a bîk tak in Rome sawlkal tawh kizawp matna hawi tak nei te a hi deu tângpí' u hi. Ziate lak a chun Rome sawlkal tawh kizawpmat tun tun lo leng' un le, a gen gual ngei un tangvâl vaihawmtu, mihausa tak mai khat ka hi.

Ka pianphung in Juda phung leh chang a piang ka hia, Pathian nam têl leh a dawichuam ka hi. A dân leh mual vawptúp ding ah a têl te lakah ka pan khak hi ka lungawi ma ma ziang a, ka kisanpi ma ma sek hi. Chun Insung pangai tak leh kitup tak ah seilian khat hi in gel thei hi' ng ka, ka Nu leh Pa' n ka neu apat in Juda- te Sikul in phatak in eila kai

sak' ua, chuleh ka Nu' n In lam in kitup tak in dân leh mual te ei zilsak zel sek hi, ka hun lai ua Juda-te Insung pangai tak te chu zia gual him a hi ki-enkawl sek ka hi ngal un.

Chanchinpha ziktu te' n a hun zik gual un, Mosi kiang a Pathian in a piak dân leh mual te chu naupang cha kahi apat in kitup tak in ka vawpdet zing hi. Mosi kiangah Pathian Thu sawmpiak te: Tual tha lo ding te, ângkawm lo ding te, gûk bawl lo ding te, het-pi tu diklo a panlo ding te leh a bîk tak in Nu leh Pa zâ leh In vengte hepi te vâng vâng chu gen bâng ding bei tawp tawbang in kala zui hi. Ka In vengte, ka Insung mite leh ka kîm leh kiang a mite chun ei ngâisâng ua, ei en sâng ma ma' u hi. Zia haw zosia ka zâwm zing ziak hin, malsawmna nasa tak hile dawng hi dingin ka kigingcha a hi. Nei leh Go, sum leh pai in kuama ka êng ngai pua, panpi ngaite lê ka thei kham kham in panpi sek in ka kihia' i.

Chun, keiuh Juda-te hi Nam kikawi chuam bîk, Nam kikawi sang bîk ka hiu a, ka kîm leh kiang ua nam dangte leh mi dangte chu ginglo leh thianglo

ti in ka musit ma ma' u hi. Ka Pu leh Pa te' u apat in Pathian hing in a ven' tûp, Pathian hât chungnung in a dawichuam, a panpî, a tûkdet te ka kiti' u in, zia khawvel a hi nikhat ni leh mizosia chung ah vaihawm ding ah kikawi te ka hi' u. Ahinla, ka gam uh chu Pathian hing thu awilo zia in mi thunuai in ka um tau a. Zia hun ahin le Rome lenggam, Rome sawlkal thunuai in ka um uh a hi. Amabochu ka Pathian Lekhabu' u leh ka zawlneite' u genlawkna a chun hukdawktu leh hukdamtu ding ka Pathian un ei sawl piak dingin a gen a, zia chu kineppî in mipi zosia' n gingcha tak leh ngaklâ tak in ka ngâk zing uh a hi. Ei tandawk tu ding chu Messiah ka ti' u in, ama chu a hung tak leh khawvel ah ka gâl te' u zosia ei zaw piak in ti' n, mitin chung a vaihawm ding in ama chun Israel lenggam hung tung dawk kit ding in ka ngâk zing uh a hi.

Ziagual achun, ka thei chin chin in ka gam leh nam leh kochuam a dingin pan nasa tak in ka lâ zing ah, Pathian thu, a dân leh mual te chu ginum tak in kala zui zing hi.

Ahinla, ka lungsung gil tak in ka thamuang zo tak tak puai, dân leh mual zuite, zawlnei te thugosia zui bukim te chun thamuanna ei pia bukim thei in ka he him him puai. Ziaziak chun, Marka' n a gen gualin kumtuang hinna chu ka hawl, ka hawl ta mai a, zia gual a ka um zinglai a chun kei gual a tangvâl khat, minthang tak mai, mi tamtak te' n Messiah ah a gel uh, ama chun ka gamsung uh a thawng vung vung a, kumtuang hinna ei piak thei khak leh ti in, kimupî ka nuam ta a hi.

Nazareth tangvâl...

Nazareth khua chu thingtâng khua ahi' n, ziaziak chun, a khua mite chule khawpi lam sang in a mawl zaw' u a, lekha thiam leh lawi-upa tâk ding mi hung piangdawk ngai ngai dingin kuama' n a gingcha puai. Ahinla, zia ka tangvâl gen pa hi chu Nazareth mi hi ziang lehle a khaw mite a gen dan uh tawh a kibat tuak him him pua, mipil tak leh thiam tak, tangvâl fel tak a hi tuak hi. Nungzui tampi tak a nei a, a nungzuite chule mi chuam chuam, mi mak tak tak mai a tam khawp mai u' i. Thilmak tam tak a bawl te zia

HINNA VÂK

in a minthang ma ma ah, ka dân leh mual te'ú, Zawlnei-te thugosia te a hiat kim ma ma ziak in kenle ka zâ khawlaw hial a, ka ngaisân khawlaw tawp hi.

A thugen dan leh a Pathian thu hil dan te ka sui sui leh zawlnei dangte, ka ho-lamkai'ú leh ginna lama ka lawi-upate'ú gen dan tawh a kibang him him pua, ama kam apat thu pawt leh a zilsaknate chun hepina leh ngaidamna um in ka hia'i. A mizia mawng mawng et in mi nuntawm tak, ama sang ah mi dang kawi masa zaw zing ziang, hepina leh lainatna a dim, mi kingainiam tak hi in ka mu'i.

A kiangin mi genthei leh haksa, mi musit- phâk leh nawchizuakte, mi hiat phaklo damlo leh thithabuak vawpte, sia-dawl leh nekgûk bawlte, numei leh chapangte chun um nuam a sa ma ma'ú a, kei ziang inlê a phat zia chu a mel ka et in ka hethei mai hi.

Nazareth tangvâl tawh ka kituakna'ú...

Nazareth tangvâl, Jesu hi ka kimupi na mun chu ka gam uh Jordan luigâl ah Judea gam ah a

hi. Galili gam apat hung zo pan ahi a ti'ú a, kimupi ka nuam ma ma hi. Naupangte a malzawl lai chu ka mu'n, vak sukbuai ziang ding chu ka nuam puai. Kipan dawk ding a kisak phat in kava nai pheï a, khupdin in mi kingai niam tak ah hi gualin kei le ka va kisuniam a, ama chun hepina mit a eila en in, ei hepi ma ma in ka hia'i. Kam thiam tak mai in Hotupa pha ti in ka ko a, Pathian bep pha a hi dan a hung gen vâng a chun a kingainiam zia ka hedawk deu deu hi. Kumtuang hinna ka nei theina dingin ka bawl ding ka dawng ah, ama chun ka neu apat ka hung zui to tâk Mosi kiang ah thusawm piak te ma kha ei gen piak kik hi. Keima'n le kisuang tak mai in ka neu lai apat ka zui zing dan ka hil hi. Kumtuang hinna chu nei awm tak mai in ka um tai.

Tichun, kisuang tak mai in, bawl be ding ka vak dawt be chun, ei dawnhu na chu ei êngbawl ut mawng mawng hi ding in ka gingcha tawp hi ahilo leh ka nei leh go te hi ei thangthîp a dia aw ka tina tiang le a um a, a ziak chu Mosi dan zosia leh Zawlnei te thugosia ka zui bukim nung in, ka nei

leh Go zosia, ka hausatna zosia zuak mang ah migenthei te panpina ah mang ding leh zia haw zosia nung achun ama zui ding in ei ti ta mai hi.

Taima tak leh gunchu tak in na ka sem a, ginum tak leh titakna tawh nei leh go ka khawl khawm a, tangvâl ka hi zing lai in, mi tamtak in mang ale a mat phaklo uh hausatna ka khawl khawm hi, ka hausat ziak leh mi kivêk tak ka hi ziak in mite za-bawlna leh ngaisân ka dawng bawka. Zia haw zosia chu nusia ah, Nazareth khua a mi, kei gual mai a Tangvâl kumtuang hinna dawi ziak ah ka zui mai ding chu ka ngaitua in ka lung a kham ta, a ziak chu nuam kasa tawk tho a, mite za-bawlna leh ngaisanna zosia chu ama ka zui chun chên dingin ka kihia, ka zui ngam ta lo a hi. Kumtuang hinna hawl ka hi zing lai in, ka damsung hun chawm cha ding bep kala ngaitua zaw ta, lunggim tak leh lungkham tak in ka nusia mai ta a hi.

Thilpha sim senlo, tawmngaina leh kipiak zawna pum ah kala bawl sek te chun, zia tangvâl pa dawi dan Kumtuang hinna lampi zuina

ding in a ting zo ta lo a hi. Ahi, a nungzui te ka et in mak ka sak na tiang a um ah, kei gual ah tangvâl hausa, sia-dawl leh sum hau, ka mite'u in a muda ma ma ziang uh Matthai khan le chu bangkim nusia in ala zui a, sum hau leh mihausa sia-dawl zakai khale a bawlkhial zosia kipuung in, ama zui ding in a kipedawk bawka hi. Ka zui ngamlo vâng in ama zui ding ah kipedawk tam tak te hile kei gual ah mihausa leh fel tak tak kiti-te a hi bawka ui. A zui ngam ziak un ka lungthim gil tak in ka êng hi.

Ka nei zosia zuak mang ah, chaga genthei te panpi a, bangkim nusia ah a nung ka zui ei phût khel khel hi vâng mak kasa a hi. Ka zui ngamlo zia kin, mihausate â ding ah vanggam a lut hak zia tekkhinna'n ei mang ah. Ka hiatlo kal in kihausatsakna leh kifelsakna ziak ah Pathian hing mu theilo, kumtuang hinna lampi zawt theilo ka hi zia ei kimudaw sak hi. Kumtuang hinna lampi ei kawkmu chu amasa'n Mosi dân zui te haw kha ahia, zia haw zosia subukimtu chu bangkim nusia ah, mani kihemil ah ama nungzui ala

HINNA VÂK

hi dan a hi. Ka hausatna, ka nei leh go te chu kei â ding ah thimpî zîng nasatak ama ka mu na ding ah ka mit lia khu tu'n a pang ta'u a hi.

Nanguh leh keima apat zil ding Zillai

Ama tawh ka kimu nung uh Kum Sang-Ni vâl a chiata, khawvel huinun dan leh chiadan le a kitheng zung zung hi. Kei vâng in ka hausatna leh felna te suang in ka khawvel ua ka kochuam uh kala chia pi a, chanchinpha pathum te ah la mu gual ngei un Mosi dân zuina lam ah le gen bâng ding in ka um lo a hi. Ka Inveng leh chanaute â ding in nawksak in ka um ngaipua, mi gensiatna lam leh hiatpitu diklo tak in le ka pang ngai puai, ka nu leh ka pa chu ka lei Pathian ahi'n, hepina tawh a sawi sel ding un ka um ngai puai. Nang uh vâng Jesu nungzui kiti ngal in, ken ka la zui kim sip sip te hile, la zui zo ngai puau a, la zui uh Jesu a kipak na diam?. Hiziang maleh Jesu khan, ka nei leh go bangma ding a ti pua'n, ka lung thim ah ka nei leh go, ka hausatna kala kisanpi ah, ka felna kala kisanpi tin ten kha a dawilo hi ding in ka gingchai.

Lal Jesu chun fel bukim ding, pha bukim ding in ei kineppi puai, ama ah kinga ding in ei dawî zaw a hi, ama chu fellona, leh titlona subukim ding ah hung a hi zaw'i. Messiah a ti'u, Messiah ding ah a ginchat uh chu ginglâna ka lungthim in a piang thim ziang hi, a ziak chu Messiah ka ngak uh tawh a kibatna um ah ka hiatlo ziak in. Tichun, Messiah chu hiam leh thal tawh hung ding ah ka kawi lai un, Hepina puan a kithuam in, lungsiatna lal lukhuk khuk in, kei uh Judate a ding bep ah ka kawi uh chu, khawvel zosia huap in tawmna nun tawh mihing tawm pen pen le huap ding in gitlona leh sualna chu hepina leh zangaina in a hung khûp ta a hi.

Thil lianpî tak kala gel khial chu, Nazareth tangvâl, tangvâl naran mai leh thilmak te bawl ah kala kawi mai mai, kumtuang hinna lampi ei kawku mu thei mai mai ding ah kala kawi chu KUMTUANG HINNA ala hi a hi. A thisan man tam tak in khawvel gitlona zosia a hun tan dawku ah, Kochuam lopi tak mai, khawvel sum leh pai, thiamna leh pilna te, neinungna leh hausatna te'n

a chawk zaw lo ding, a suksiat theilo ding chu a hung din ta a hi.

Ahinla, Jesu Khrista gingcha ngal in, Jesu Khrista ah pianthakna leh kimuchianna nei ngal in Mosi thusawm piak te gen tâk lo, la kochuam uh dân leh mual te le zui hawi peilo in la um ua. Pathianni leh Kochuam ni pawimaw dang te le vawp thiang peilo in la um gam ta' u hi. Pathian Kochuam a um ngal in sawm a khat la gu sek nalai un. Khrista melhiat leh Kochuam mi hi zing ngâl in khawtâng leh kochuam sung ah migentheite, mi musit- te, gitlona ziak ah kochuam le bêl ngam talo te ho leh biak thei ding ah le la um tak lo uhi a khawk khawp mai hi. Lal Jesu, a nung la zui uh hi gilote leh dai pawlam ah mi nawl tâk te gual pha a hi kha. Ziagual mite khan Jesu kiang ah um nuam asa sek un, nang uh ngeile ziagual mite a ding ah damna, lungmuanna a muna mun uh hung hita' u in. Chun, Kochuam sang in la kîm leh kiang ua thil dangte la ngaikhawk zaw sek un, Khrista thisan mantam tak ah chawk Kochuam lul zia la hiatmil khak ding uh ka hung

lau pi hi. A changpha lo, a mu phalo te' n ka hung ên na pen uh a hi ngal a.

Kei guala hausatna kisanpi ah Kochuam sung ah la um zing uh chun, tawmna nun leh kingainiam na tawh a hung tandawk tu Jesu lung lam hi dingin ginchat a um puai. Hausatna chu khawvel sum leh pai, nei leh go khel khel a hi puai. Chapona tamtak leh sang tak neite chu chapona ah Hausa la hui a, mi mani kingaisang ah midang bangma simlo te chu kingaisâ' n na ah Hausa a hi kit hi. Midang thu la nuam lo ah, mani thu bep chiapi nuam te chu thupengpel ah Hausa a hi kit hi. Bang thil hi' n; ngaituana hi' n, lunggel hi' n, umchan hi' n, tawidan hi' n, kampau hi' n, bang cheng chu hi ziang lehle, Jesu sang ah ngainat zawk, Jesu Khrista hepina apat pawt a hilo chun, keima' n ka kisanpi hausatna leh felna Jesu nung ka zui theilona hi tawh a kikhiatna bangma a um puai. Ziaziak chun, keima ka pawt zaw nung ah Lal Jesu' n a nungzui Peter kiang ah, Peter in ***“Kei un bangkim nusia in ka hun zui’ui”*** a tia a dawt lai akhan ama chun, ***“Titakzet***

HINNA VÂK

in ka hil la hi, kua le a In a h'em, a suapipa a h'em, a pa a h'em, a suapinu a h'em, a nu a h'em, a zi a h'em, a cha a h'em, a gam a h'em, keima leh chanchinpha zia ah nusia chu, tu'damsung ma ma hinle, Inte, suapipate, suapinute, nute, pate, gamte, sukgentheina tawh ale'za khat ah mulo ding a um puau, a hung tung ding kumtuang hinna tawh" (Marka 10: 28-30) ti in ala dawn hu hi. Keima'n le kala hiat vak lo khawk ka sa khawp mai hi!

Zia khawvel ah mihausate chanchin leh khangthu sût sek ala hileh chu, tuni hun a hin kei chanchin hile ala kisût ngei ding in ka gingchai. Ahinla, ken ka hausatna kala têt zawk tak zia kin, ka chanchin sût zawm zel ding a um ta lo a hi. Hiziang maleh, bangma le kala simlo uh, Mary nawchizuaknu-te, Nga man mai mai ah kala kawi uh Peter te haw, ka sim maw ma ma' u siadawl Matthai te haw khan, bangkim (Sum leh pai, nei leh go, minthanna, nawpsakna, îtsîkna, chapona, kingaisâna, a dang dang te...) nusia in Nazareth tangvâl chu ala zui un, tuni tiang a hin

a min uh a mang ta lo a hi. Ahingei hi, Sawlchak Paul ngei khan le, bangkim nusia in ala zui lo hileh tuni tiang a hin kuama hiat in um ta pua'n a.

Lal Jesu zuite'n kisîkna a nei ngai pua'u a, a hun leh phât nei ngal ah, ama ngei in ala chial, thagau thiangtho mangcha a nung zui ding ah a chial nung ah le zui lo te â ding in kisîk na leh haksatna chu lawmman um sun a hi. A hun la nei lai ngei in, la hausatna zosia nusia in Nazareth Tangvâl Jesu chu ala zui ta'n.

Thukhâna:

I bible phatna leh lulna ma ma chu, Khristian hinkhua ah i mamaw leh pawimaw ding zilsakna te, thu leh lâ te i khuat daw thei leh i laidaw thei hih hi in ka ngai hi. Chun, mihing hinkhua ah taksa leh thagau a i niam pen hun inle i bible hin Jesu Khrista chanchinpha malam kinepna vâk tak gou ei khawl piak a, lunglut tak leh simna nun tawh Bible kingakna nei te a ding ah chun kinepna leh thamuanna bangma dang in ei piak theilo ei pia sek a hi. Ziagual ma chun, tuchung a hin le Mihausapa i vak kichan

a, zillai mudawkw thei pawimaw tak mai i mu thei chu, hun tam tak leh mun tam tak in i hausatna te (Nei leh go, sum leh pai, sepna leh nek hawlna, buaina leh ki gelsiatna te, chapona leh thânghuaina te, duâmna leh minthanna- te, a dang dang..) ziak in Jesu i phatsan sek hi. I khawvel khantona un Jesu sang ah dawi zawk ding, têt zawk ding thil tam tak ei pia ngal a. Lal Jesu lam en zing ah kal i suan

lo uh chun, mihausapa gualah lunggim takah um khawlaw ding i hi'u. Mihausapa'n vâng kisiam phatna ding hun leh phat a nei ta pua, nang leh kei i hileh chu Lalpa'n hun ei pia nalai hi. Khaile! Hun pha i nei lai pet ua hin, NAZARETH TANGVÂL nungzui dingin kisa thak hitiu le!. Lalpa'n ama ah kinga thei chiat dingin a thu i zil khawm uh ei malzawl piak ta hen. Amen.

Lal Jesu gual a mi lawp thiam a pawimaw hi

*Pi Ngaineikim
Bethany Kochuam*

Tuanthu pakhat kasimna a chun.....(atak le ahi maithei)

Sâp gam, mun khat ahin, kuama'n a chawm peilo nîn/kidak ste chawmdawkw sek ah, nêkhawl nupi pakhat a um ah, nikhat chu Biakln in a hung kikhawm a, thugentu pa thugenna apat chun kochuam member khat hî nawpna lungthim a hung nei ah, a mâilam a hung zuan ah, thugentu pa kiang a chun Jesu a taksan dante, a gingchâk dante leh baptisma chang nuam a hi dân te a hung gen a. Himaleh thugentu pa lungthim ngaituana a chun, *“oho, la nîn na e maw, la gim le ase na lawm lawm e, kidak la chawm-dawkw sek ah, êk In te la suthiang sek a, mipite hin bang ngaidân a nei diam uh maw?”* ti ala gêt ta. Zia phât chun, thugentu pa chun, *“In lam ah chia kit phawt inla, baptisma la chang masang in va pauchap phawt nalai in”* atia. A kâl kit lam a chun, nupi nu chu a hung kit ah, himaleh thugentu pa chun ala sawl mang zel a.

HINNA VÂK

Nikhat chu, restaurant/hotel khat ahin thugentu pa chu nêkthei leh thingpi dawn ah ala um laitak ahia, nupi nu chu a hung mu kit ah. Nawpmaw a sak di khâ lau in, nupi nu chu ava nai pheï a, *“Bang ti maw? Lahung kikhawm kit kha tapua? La pha nai maw? Bang ti lahem?”* ti’n a vak dawng ah. Nupi nu chun a dawnhu a, *“Bangma kati puai, ka pha ma ma ziang ei, Jesu tawh kaki tuak ua, kochuam mi hilo ziak leh baptisma changlo ziak ah lungkhamlo ding in ei hil a, ei thamuan hi”* a vak ti leh, thugenpa(Speaker) chun maksa deu tak in *“Oh, khuti maw? Bang ti dân a maw?”* ti’n avak dawnhu kit a. Nupi nu chun, *“I, ahi ei, Jesu tawh ka kiho ua, hiti hin ei gen hi...Ama(Jesu) ngei le zia kochuam ah um nuam ma ma in kum tampi tak ala lût gua sek a, maleh kuama’n eila pawm nuam puau a, eila lawp nuam sek puau(welcome lo)”* ti’n a dawnhu hi.

Tuni hun ah zia thu-zik sim kha zosia’n, i Lalpa’u Jesu’n ei zilsakna leh a hinkhua apat midangte ala lawp/pawm dân te vak ngaitua daw k thak le’u hin dawium kasai: *(thuthak leh hiat ngailo vang hi*

ding in ka gingcha pua, sia leh pha hiatna ale i hiatsa’u, dik i sak ma ma’u hi ding a hi. Kingaitua daw thak na ding leh kichapno thak na ding le hizaw ta’na)

Jesu’n khen chuam a nei diam leh? Jesu’n pawm nawplo chuam a nei lam i hekha’u em?

Romte 15:7 “Khrista’n nangmau ahun lawp gual in, nangma’ule kilawptua chiat un”

I Lalpa’u Jesu Khrista hinkhua i et chun; phâkte ala lawp a, mitthûm, kêngbâi, zeng, leh nawchizuak natiang le ala lawp a, ala pawm hi. A hina dân dungzui chiat un Jesu’n ala pawm sek a, pawm lo a nei ngailo a hi. Zia chu a hi zinglai in, Kochuam sung ahin mi nuainung deu te bang gual in i lawp sek uh em? Gualbânlo-kêngbâi ahiloleh mitthûm(specially abled) te hung kikhawm taleh mak i sa mai diam uh? I umdan uh a pangai(normal) tho diam? Nidang ah zukham sek, zu dawn sek te Lalpa pawl nawpna lungthim hung nei in, hung kikhawm tale’u, i etdân uh a chuam mai diam? Banggual in i la lamtua diam uh le? Inmun/Lo-mun nei, building thupi tak tak nei, sepna neipa/neinu tawh i et

dân uh a kibang tho diam leh? Zia thu hi i sim zinglai inle lungthim achun, “*kibang di kawm*” ti bailam khawp mai in ah, a tak-tak a hung tun phatleh i gensa hiatmil bailam zawsek a bang hi maw? Bangti’n la gel em nang?

Tuanthu apat chun, thugentu pa’n nupi nu kha bang zia ah ala lawplo ah, ala pawm nuamlo a hi diam? Mi genthei, mi chaga a hi zia ah a diam? Thugentu pa’n nupi nu ala pawmlo hi a zia ah um ding in ka gingchâi, himaleh Jesu’n vâng a zia ah umlo in mi zosia a pawm sek hi. Jesu ei pawm dân hi condition umlo a hi (unconditional acceptance/love).

Romte 5:8 “....migilo i hilai ua, Khrista chu i sik un a thi ta a hi” Jesu’n ei pawm dân leh ei lawp dân hi a thupi kasa sek hi. I titlo dân gual zel in ei pawmthiam thei a, i phatlon- a tam, a tawm, a lian, a neu, muthei/mutheilo te hi Jesu’n ei pawm piak mai sek hi. Lal Jesu gual lungthim put hi i mamaw ma ma sek u’i.

En bang gual in mi i pawm/lawp sek em leh? A neizo deu te bep ila lawp sek em? Thingtânglam te lawp dân tawh Phâigam ah umte lawp dân i kikiak sak kha em? Ahiloleh, a kivan dân te apat un

ila en sek em? Lekha thiam leh thiamlo in i khen em? Sepna nei leh neilo in mawleh?

Ei thângthîp te hin, ei ho ding le peingailo hisek lo uh maw? Ngaidân kituaklo zia ah ila kinialpi khâk te vâng chu i kiang ah le um nuamlo uh a bang sek veu maw? Pathian in ama mêl kibatpi ah a siam mihing te hi gil tak ah ka ngaitua phat leh, kimuda sâng in kipawmtua leh lawptua ding te ihi dân uh ei hiatdaw sak sek hi. Mihing hinna lul dân ei ngaitua daw sak a, mihing te hinna chawmcha sung hi kimudana ding leh kinawltuana ding in a pamai kasa sek hi.

Khenchuan neilo a, a nung i zui uh Jesu Khrista’n mi zosia ala lawp sek gual hin, enle Ama zuitu ah i kingai chun, Kochuam sung hi’n, In sung hitaleh, malzin hi’n, malzin lo hi ziang lehle, bukimlona khawvel - ngaidân kibanglo leh mihing zia kibatlona ahin, kilawptua dan thiam a ngai ah, hepina tawh kipawm thiam zel hi pawimaw lasa pua maw nang?

Lalpa’n simtute zosia hun malsawm chiat ta hen. Amen!

KHRISTIAN SUNGKUAN

Seminar Paper

Guanggaltu : Pi Chinglalven & Pi Kim Mary
Compile : Pi Chinglalven, Secy. CKNP

Introduction

Amasa'n sungkuan kiti hi a phudawktu/siamdawktu hi Pathian a hi ti i hiatsa'u himaleh a thak ah i hiat dingun ka daw i hi. Sungkuan chu Pathian lunggel leh thiltup sukpitinna a hi (Eph. 3:15). Khawvel ah sungkuan/inkuan um zosia hia alawmpi in Chi ni (2) in a khenthei hi. Zia chu – Khristian sungkuan leh Khristian hilo sungkuan a hi. A chawm lam ah genin Khristian sungkuan chu Pathian daw i dan leh a thu tawh kituak a kilemto sungkuan a hi. Khristianlo sungkuan chu Pathian dawina leh a thu tawh kituak pansan lo ah sungkuan kilemto genna a hi. Tuni i genkhawm ding uh a hileh Khristian sungkuan ti a hi. Amasa penin sungkuan umna zia k tamlo in genkhawm hi ti'u:

1) Sungkuan umna zia k:

a) Pathian ngaisak chisuan a hung pun theina ding: (Mal. 2:15)

Sungkuan masa pen kiang ah Pathian in chisuan ah lei chung lua dim dingin thu a pia a hi (Gen. 1:23). Zia chu Adam leh Evi a kipat Pathian ngaisak/limsak mihing tam zawsem a hung kibelap ding Pathian in a daw i zia k a hi. Pathian in nupante cha leh nau malsawmna ei piak hi i hung

upat ua, i hung hatlo nung ua ei enkawltu ding leh ei chawmtu ding bep hilo in i Lalpa'u Jesu Khrista hiatna ah i chawp pitin ding uh leh Pathian ngaisak mihing a hung pun theina ding zawk ah guat ahiu, zia chu i mawpuaknau pawimaw pen a hi. Pathian ngaisak chi i suan theina dingun bang pawimaw i sau em?

b) I kipanpi tua chiat theina ding uh:

Pathian in pawsal panpitu

ding leh kithuapi dingin numei ala siam a hi. (Gen. 2: 18).

Zia “Panpitu” i ti hin insung ah panpitu i neite a h’em, suak a h’em, genna lam a kawkah, eiman i pawsalte i panpi dan genna a hi zawi. Jesu’n le Thagau Thiangtho hi gingtute â ding ah panpitu a hidan a la gen hi (Johan 14:16, 26; 15:26; 16:7). Zia Thagau Thiangtho chu Pathian dawidan a bukim theina ding ah ei panpitu a hi ti genna a hi (Deut. 3:7; Sam 33:20; Hos. 13:19).

Ziaziak chun numei hi pawsal kithuapi ding ah siam i hi zia kun kingainiam tak ah i pawsalte’u bangkim ah kithuapi ah i panpi ding uh a hi. Zia chu sil leh chên ahte, pawt leh tun hun ahte, nek leh chak ahte, tu leh cha etkawl na ahte, a kimatnate ah, sum leh pai etkawl na leh a dang dang inle ama ngawn ah bukimlo leh ama ngawn ah sungkuan bawl theilo a hi dan hia in a panpitu numei a lungsiat ah a kipanpitua ding uh a hi (Eph. 5:12, 24).

Sungkuan ah Pathian dawi dan a guitun theina ding in

banggual ah panpi ngai in la um em? Chate tawh kipanpitua dial dial in la um em?

c) I kizilsak sawn zel theina ding uh:

Khristian sungkuan chu school masapen a hi, nu ahileh zilsaktu (teacher) masapen a hi zia kin naupangte etkawl na ahin chingthei tak leh pilvang tak ah zilsak a pawimaw mama a hi. Pathian in Israel nu leh pate mawpuakna a piak pakhat a hileh, a chateu kiang ah Pathian in a hukdaw dan te leh ama tawh kisai ah thute zilsak ding in Mosi apat in a hil ah (Deut. 4:9; 6:7, cc).

Pathian ngaisak sungkuan a pun theina ding in insung kiziltilna ah Pathian thutak i chaten a zui ngei na ding ua i ziltil uh a pawimaw hi. Chate’n khawvel ah a zil masat pen uh hi school hilo in insung ah a hi. Naupang a ding in zilsaktu masapen chu ‘Nu’ a hi. Insung ah chate’n pate sang in nute tawh hun a mang tam zaw’u a hi. Ziaziak chun nute’n chate i etkawl na ahin pilvanna ding a tam ma ma hi. Zia ban a chun naupang te’n a thu ah

HINNA VÂK

i genthaw maite sang in i umchan leh tawidan apat in a zil tam zaw'u ti hi a dik a hi.

I chaten ei apat in bang a zil dawk tam pen uh em?

Pathian phatna a zildawk uh em?

Chep leh muam bawl dan a zil dawk uh em?

Chate hi Pathian apat ah i gochan a hi ziakun i etkawl dan leh ziltill dan a hin pilvan a ngai ma ma hi.

d) I kivaihawm theina ding uh (Heb. 3:4):

Khristian sungkuan a chun kivaihawmna fel tak a pawimaw hi. Kivaihawmna fel ti hin kivaipuakna, kisawrkalna leh ki-etkawlna a kaww vek hi. Sungkuan kivaihawmna ti hin, Lampi dik ah i chia theina ding (Tpl. 33:6), thumat dan i zilna ding (Eph. 6:1-3), Pathian dawidan zilna ding (Eph. 6:4) leh thil chuam chuam zilna ding ah kivaihawmna mun a hi. Pathian in sungkuan ah vaihawmtu (Authority) lian pen ding in Pa a guat a hi (2 Tim. 2:14; Ephe. 6:4). Ziaziak chun sungkuan kivaihawm dan Pathian in a guat hi zawm

ah zi te'n Pawsalte hi zâ ding a hi (Eph. 5:22- 24). Lalpan in a sak i hi'u a pawimaw hi (Sam 127:1). Lalpa panglo ah kivaihawmna insung chu inkuan kitup tak leh kituak tak ah khawsak khawmna a vang ma ma hi. Insung kitup tak ah i etkawl theina ding leh kitup tak ah vai i hawm theina ding in Lalpa ah kibulphu a pawimaw hi. Ziagual chu i hitheina ding a chun Pathian nei a ngai ah, insung ah Biakna hun, insung maicham ngaikhaww ding a hi. Insung maicham nei zing sek i hi ding uh a hi.

Banggual kivaihawmna insung a hi em la insung?

2) Sungkuan ah haksatna um theite:

a) Nupan kituaklona ziak ah haksatna:

Nupan kituaklo hi insung a ding ah haksatna tuntu lak ah lian pen a hi. Zia chungchang ahin nupan zosia'n haksatna i tuak uh kibang vek lo ding a hi ti i he chiat u'i. Himaleh, i Pathian Lekhabu Thaingtho in mitin tuak ding ah a gen te i tuak uh a hi thim chiat hi.

Ziaziakchun, i pawsalte tawh haksatna leh kipakna i tuakte piting tak ah genkhawm zel ah, kihiatthiam tuana nei ah, kisiamlem zel ding hi i mawpuaknau a hi. Nupan kilemlona ziakin kikhenna (Divorce) bang a hung tung sek ah, naupang nu leh pa kilungtuak ah etkawl na nuai ah seilian bawn mi a phak ding tiang pha zolo aum lai un, naupang nu leh pa kikhen te chun lungthim pitin lona (Inferiority complex) anei sek uh a hi. Ziaziak a chun nupan kilemlo tak ah hinkhua mang lo in i kilaichinna leh hepina hi sukdet zel a pawimaw a hi. Zia chu eima thahatna hilo in Pathian Thagau Thiangtho ah kipuihuai sak a ngai zel a hi.

b) Sum leh pai leh Nek leh dawn ah haksatna:

Mihing zosia hi nisin in sum leh pai ngainatna hin a hip khawp mai ah, ziagual khawvel ahin Khristian sungkuan te hi vang sum leh pai ngaitnat takluat hi a hi kei pua, a ziakchu Pathian tawh kilaichinna a sutawm thei in, ei puimang thei a hi. Zia dinmun

ahin i Bible in ei zilti gual ah chantawh ah lungawi na nei hi apha pen a hi, Pathian in mawpuakna ei piak haw hi supiting thei in insung ah haksatna tamtak tung thei te zosia le subei thei ding i hiu. A tam a tawm thu hilo in sum leh pai mat dan leh etkawl dan thiam a pawimaw hi. Zia ban ah pawimaw dang khat chu i dawite leh i mamawte hiat khen thiam a ngai hi. Zia ding a chun nupan kithutuakna a pawimaw a, zia ban a chun nei leh lam, sum leh pai, nek leh châk dinmun chate kiang ah hiatsak ding a hi.

c) Khamthei thil ziaakah haksatna:

Khamthei thil iti hin a kawkthei a tam ah, a thupi penin zu leh narcotic drugs (No. 4, WY tablet, ganja) lampang vak gen leu hin, a ziak chu zia khamthei thilte hi khawtang natna (social disease) ti inle a kigen sek a hi. Tumlam gam ah a tam zawte lak ah khamthei a hung bawl na ziak uh a hileh insung buaina ziak le a hi bawh hi. Khamthei i ti hi a laluttu umlo/pawluttu umlo

HINNA VÂK

in ama ngawn in Insungin a hung lut theipua, ziaziakchun insung kietkawlna phatak i nei chun khamthei bawl zia ah insung ah haksatna hung um theite lak in bit thei ding i hi'u. Khamthei bawl zia ah insung ah haksatna um theite:

- i) Insung ah ut dan kituaklo sak.
- ii) Nicheng ah sum mat dan kidailo.
- iii) Kinak leh kinialna tun sak.
- iv) Nupan kal leh chate tawh kal ah kituaklona tun sak.
- v) Sungkuan kim ah insung maicham umsak theilo leh a dang dang.

d) Mo leh insung mite kikal ah haksatna:

Mo kiti hin a dinmun a hiatchian a pawimaw ah, Mo pha a hina ding quality zosia hi a neu ah kipat ala ziltitu ding hi a nu a hi, insung a chen khak lona mun ah hung lut ahi zia kin a diakin insungmite lak ah nu pen hin lamtua thiam henla, puihuai thiam in Pathianthu tawh kituakin ala kisingsa leh chu buaina leh haksatna um dingin ginchat umlo a hi.

Khristian insung i kiti vang un a chang leh mo leh insung mite kikal ah haksatna a um thei zel hi. Zia haksatna hung tunna zia tangpite chu:

- i) Kihiatthiamlona um zia k.
- ii) Sungkuan kipumkhat lo zia k.
- iii) Kichuam bawl na um zia k.
- iv) Insuang ah mo thunei utna zia k.
- v) Nu in a chapa Zi nei nung ah le a thuneikhum guat zia k ah mo tawh kikal siatna um.
- vi) Insung mi hilo insung ah hung kidaila tak luat zia k/thu hung nei zia k.

Khristian sungkuan mite lak ah ziagual haksatna umlona ding ahin kihepitua ah Pathian dawng kawm ah vai i hawp thiam uh a pawimaw hi.

3. Khristian sungkuan leh Birth Control:

Birth Control /Family Planning kiti hi thilsia a hi puai. Sungkuan khawsakna tawh kituak ah cha nei ding zat ngaitua chu a hi ding ma a hi. Himaleh, i hiat zing ding uh chu Pathian lemguat chu

bangman dâl zo diak puan a. Mihing lungthim in kiguanggal sek maleh a lawtinsaktu chu Pathian a hi(Tpl. 16:9). Ziaziak a chun nau nei i gua em a gua paw em, a hung tung bang bang lamtua theiding ah kigingsa um ding a hi. Birth Control dan tamlo enkhawm hiti'u:

a) Kisumna (Natural Method)

Kisumna kiti hi chi chuamchuam aum ah. Tuni hun ah kisumna i gen ut pen ahi leh, nupan kikal ah (sex) lam ah kisumna a hi. Nupan kikal ah kisumna hi Birth control bawl na ding ah damtheina pen a hi. Himaleh, nupan kipawl na hi Pathian in nupan kal ah mat ding a ei piak a hi ziak in zia kisumna hin nupan kal a sukbuailona ding in pilvan a ngai ma ma hi.

b) A danna (Contraceptive) mat:

Nupan kipawl na bawl nuam himaleh nau pai nuamlo ten damdawi leh a dalna chi chuam chuam a mang u'i. I hiat tangpi'u chu Condom leh i Pill a hideu pen hi. Khawvel mithiam ten bang hun a pat

ni bangzat zaw leh sung lam a um (Foetus) pen hi hinna nei mihing suak a hem ti dawnhunna kichian tak leh zia hi a hingei na'i ti thutanna neilo a hi'u. Khenkhat in chawlkal 8 (eight) tile a um ua, khenkhatin zia masang a hiloleh zia nung lam a chun nau vawp thei a hi a ti kit zel ua, bang cheng hitaleh, ei gingtute'n zia tawh kisai ah i hiat dinguh pawimaw chu Contraceptive pill hi kipawl na neizaw ah nek a hiziakin pawsal leh numei chi (seed) a la kigawm zota a hi. Zia damdawi chang pen khan sung lam ah hinna nei mihing kisiamlai that thei a hia, tualthat kisuak thei i hi ziak in pilvan ding a hi (Jer. 1:5; Sam139:13-16).

c) Nau neitheilo ding ah kisiam (sterilisation for birth control)

Gingtuten Pathian in nupan ei siamna ziak i hiatsa a hiziak in nau neitheilo ding ah kiasm hi bawl lo ding a hi. Himaleh, damtheina tawh kisai ahi chun thu chuam tiin hun sak phawt mai hi ti'u.

d) Nau kisiam tasa sukthak

(Abortion)

Nau sukthak hi Khawvel pumpi genlo in i gam inle a tam ma ma ta a hi. I gen taksa gualin tuisik apat ah hinna nei mihing ah kisiam zota sukthak pen hi tualthana lau um tak a hi i tilo thei puai. Ziagual bawl i um khak ua chun Pathian kiang ah ngaidam dawt ngal ding a hi. A hinlah, damtheina lam tawh kisai ah Abortion bawl lo theilo i hi chun thu chuam a hi. Pathian in ziagual ah umte chu a law ding dan he ma ma in ah ti'n zo mai hi ti'u.

5. Nu leh Pa te mawpuakna:

Pathian in nupan hi ding in ei siam a, eimau a patin lei chung a hin mihing a siam belap zel a hi. Khristian sungkuan hung kipatna chu kichenna a hi (Gen. 2:24). Ziaziak chun mawpuakna i nei uh chu Pathian dawi dan ah i chateu i etkawl ding uh hi a hi. Nu leh pate'n chate Pathian dawidan ah i etkawl nau ah mawpawtu pen chu Pate a hi'u. Ephe. 6:4 na chun chate etkawl na leh zilgaina ah pate min kilatna a um hi.

Taksa leh thagau ah

sungkuan enkawltu ding pen chu pate a hi'u. (cf 1Tim. 5:8) Mawpuakna lian pen pate khut ah um himaleh nute hinle pate etkawl na dan zui ah chate etkawl na ah pate panpitu ah i pan ding uh a hi. Ei thingtangmite lak a hin nute hi mawpuakna lianzaw nei in i ngai ua, ziaziak hin pate leh chate kâl a hin duthusam ah kilaichinna pha a umlo khawlaw sek a hi. Bible in pate chu chate chung ah thunei ding in a guat a, chate tawh hun mang khawm man ngailo pa bang a h'em zat um ding a hi'u. Chate tawh hun mat khawm tam lo ziak ah chate thuzaw talo pa tam tak le um ding i hi'u.

Zia ban a hin chate neu lai a thuzaw a let nung ua thuzaw talo tam tak le um kha maithei i hi'u. Chate etkawl na ah nute leh pate hin chanvo kihawp thiam a pawimaw ma ma a, nu leh pate chu chate pawimaw, taksa leh thagau ah chawmtu leh petu leh lamdik kawkmutu i hi ding uh a hi.

Insung khenkhat a chun pate umlo le a hi maithei a, ziagual

June 2022

dinmun a hin pa dinmun ah
ding thei te'n mawpuakna lak
thiam pawimaw ma ma in a. A
tawpna pen ding ah Khristian
sungkuan zosia chu a bukim
leh a hawipen (Perfection) ti
ziang thei ahi pua, a ziak chu
nisin ah doding (Challenges)
tamtak aum ah, dozaw thei
na dingin Pathian mapuina ah
kingak ah Thagau Thiangtho
puihuaina a pawimaw hi.
Thagau Thiangtho puihuaina

i chan thei na dingun Thagau
Thiangtho mizia ihiat uh a ngai
hi. Thagau Thiangtho mizia chu
kingainamna, zaidamna leh
nunnemna te a hi. Ziaziakchun
khristian sungkuante chu
pangkawm ah, semkhawm
ah, kitawsawttua ah, bang
dinmun hi ziang leh le
kingaidam tua ah, Thagau
Thiangtho mizia suklat a
pawimaw zel a hi.

*Kipak zing ding ka tel zaw'i, ka damtheina a ding ah pha a hi ziak
in ~ Voltaire*

*Lunggil lungngai chu natna hik tizat um tak gual a hi. ~ John
Steinbeck*

*Khua leh tui pha hîna leh damtheina chu gam leh nam a dingah go
thupi pen a hi. ~ Winston Churchill*

*Kipak tak ah nui leh tui tak ah imut thei hi doctor te lekhabu a
chun damdawi phapen a hi. ~ Irish Thupil*

*Hausatna diktak chu dangka leh sana hilo in, damtheina hih a hi.
~ Mahatma Gandhi*

KNP HUANG



LEILON PASTOR BIAL KOCHUAM NUMEI PAWL TE ORPHANAGE VÊNA

Leilon Pastor Bial Kochuam Numei Pawl Kikhawmpi 20 veina 2022, General agenda no. 5 na dungzui in, nauchaga chawpna munkhat pen pen ve ding ti thupukna nei in, Leilon Pastor Bial KNP te'n anngawl pauchapna khatvei nei khawm in, thilpiak ka chawi khawm ua, zia thilpiak ka chawikhawm te'u mangcha in 7th May 2022 missionary day ni ah (Grace Children Home) vena nei in, Bialtu Pastor Rev. Khuplemlal malat na'n Pathian thu leh lâ ah hun mang in, thilpiak ₹8420/- pia in, chuleh refreshment nek leh dawn khawmna nei in, kipak leh thanuam tak in hun ka va mang khawm ua, lungdam a um ma ma hi.

Ziagual ah Lalpa'n Leilon Pastor Bial KNP te nauchaga chawpna mun ve thei ding ah ma ei pui ziak in, ei puitu Lalpa chu lopina chang ta hen. Amen!

Pi Hoingailian
Secretary, KNP
Leilon Pastor Bial

June 2022

NEW LAMKA BIAL KNP IN A BIAL SUNG AH BRANCH TE VE CHULEH SEMINAR NEI

10th May 2022 nitak a New Lamka Pastor Bial KNP te Bialsung kivetuana, Bethlehem Church Ngathal ah nei in, Malzawlina guazu maleh a chia sun te'n Pathian malsawmna dawngin Programme lawk tak in a mang thei ui, Lalpa'n lopina chang taken.



24th May 2022 nitak ah, New Lamka Bial KNP te'n Bialsung kivetuana, Programme Olive Church Gangpimual ah nei in, Pathian mapuina zalin lawting takin a mang zo ui. Lalpa'n Lopina chang hen.



14th May 2022 ni ah New Lamka Bial KNP in Pauchapkhawmna leh Seminar mang in, Seminar Thupi: "Taksa leh thagau ah Nûte mawpuakna." ti mangcha in Rev. Nicky Lalremmawia, bial Pastor in zilsakna a nei hi.